

自止我一冤神展轉五母腹中作子依因二
親受形成人而使五母啼哭發狂各念我身
乃欲自殺是故笑耳我念世間欲網因緣生
死罪福造行根源惡入地獄善行生天我畏
世苦辭家入山精進禪定得道昇仙覩見餓
鬼地獄畜生苦痛之處代爲恐怖憐傷五母
不能自脫又憂我身我所求索願行如言求
離生死斷絕身根如人不種當所泥洹善會
師說已飛騰空虛
沙彌羅經

玉耶經

東晉西域沙門竺曇無蘭譯

聞如是一時佛在舍衛國祇樹給孤獨園佛
爲四輩弟子說法時給孤獨家先爲子娶婦
得長者家女女名玉耶端正姝好而生嬌慢
不以婦禮承事公姑夫壻給孤長者夫妻議
言子婦不順不從法禮設加杖捶不欲行此
置不教訶其過轉增當如之何長者曰唯佛
大聖善能化物一切剛強弭伏無敢不從請
佛來化妻言大善明早嚴服往詣佛所頭面

者地前白佛言我家爲子聚婦甚大憍慢不以婦禮承事我子唯願世尊明日自屈將諸弟子到舍中飯并爲玉耶說法令心開解改過行善佛告長者善哉善哉給孤長者聞佛受請歡喜禮佛接足而去歸舍齋戒供辦中飯明日佛與千二百五十弟子到長者家長者歡喜近佛作禮佛坐已定大小皆出禮佛却住玉耶逃藏不肯禮佛佛即變化令長者家屋宅牆壁皆如瑠璃水精之色内外相照玉耶見佛有三十二相八十種好身紫金色

光明煒煒玉耶惶怖心驚毛豎即出禮佛頭頂懺悔却住右面佛告玉耶女人不當自恃端正輕慢夫壻何謂端正除去邪態八十四垢定意一心是爲端正不以顏色面目髮綵爲端正也女人身中有十惡事何等爲十一者女人初生墮地父母不喜二者養育視無滋味三者女人心常畏人四者父母恒憂嫁娶五者與父母生相離別六者常畏夫壻視其顏色歡悅輒喜瞋恚則懼七者懷妊產生甚難八者女人小爲父母所檢錄九者中爲

夫壻禁制十者年老爲兒孫所訶從生至終
不得自在是爲十事女人不自覺知玉耶長
跪叉手白佛稟受下賤不知禮儀唯願世尊
具說教訓爲婦之法佛告玉耶婦事公姑夫
壻有五善三惡何等爲五善一者爲婦當後
卧早起櫛梳髮綵整頓衣服洗拭面目勿有
垢穢執於作事先啓所尊心常恭順設有甘
美不得先食二者夫壻訶罵不得瞋恨三者
一心守夫壻不得念邪淫四者常願夫壻長
壽出行婦當整頓家中五者常念夫善不得

念惡是爲五善何等爲三惡一者不以婦禮
承事公姑夫壻但欲美食先取噉之未冥早
卧日出不起夫若訶教瞋目視夫應拒獨罵
二者不一心向夫壻但念他男子三者欲令
夫死早得更嫁是爲三惡玉耶默然無辭答
佛佛告玉耶世間復有七輩婦何等爲七輩
一婦如母二婦如妹三婦如善知識四婦如
婦五婦如婢六婦如怨家七婦如奪命是爲
七輩婦汝豈解乎玉耶白佛不知七婦盡何
所施行願佛爲解之佛告玉耶諦聽諦聽善

思念之吾當爲汝分別解說何等爲母婦母
婦者愛念夫壻猶若慈母侍其晨夜不離左
右供養盡心不失時宜夫若行來恐人輕易
見則憐念心無疲厭憐夫如子是爲母婦何
等爲妹婦妹婦者承事夫壻盡其敬誠若如
兄弟同氣分形骨肉至親無有二情尊奉敬
之如妹事兄是爲妹婦何等爲善知識婦者
侍其夫壻愛念懇至依依戀戀不能相棄私
密之事常相告示見過依訶令行無失善事
相教使益明慧相親相愛欲令度世如善知

識是爲善知識婦何等爲婦婦者供養大人
竭誠盡敬承事夫壻謙遜順命夙興夜寐恭
恪言令口無逸言身無逸行有善推讓過則
稱己誨訓仁施勸進爲道心端意一無有邪
眇直修婦節終無闕廢進不犯儀退不失禮
唯和爲貴是爲婦婦何等爲婢婦者常懷畏
慎不敢自慢兢兢趣事無所避憚心常謙恭
忠孝盡節言以柔輒性常和穆口不犯麤邪
之語身不入放逸之行貞良純一質朴直信
恒自嚴整以禮自將夫壻納幸不以嬌慢設

不接遇不以爲怨或得捶杖分受不恚及見罵辱默而不恨甘心樂受無有二意勸進所好不妬聲色遇已曲薄不訴求直務修婦節不擇衣食專精恭恪唯恐不及奉敬夫壻如婢事大家是爲婢婦何等爲怨家婦者見夫不歡恒懷瞋恚晝夜思念欲得解離雖爲夫婦心常如寄客信信闢諍無所畏避亂頭墜卧不肯作使不念治家養活兒子或行姪蕩不知羞恥如狀犬畜毀辱親里譬如怨家是爲怨家婦何等爲奪命婦者晝夜不寐毒心

相向當何方便得相遠離欲與毒藥恐人覺知或至親里遠近寄之作使瞋恚常共賊之若持寶物雇人害之或使傍人伺而殺之怨枉夫命是爲奪命婦是爲七輩婦玉耶默然佛告玉耶五善婦者常有顯名言行有法衆人愛敬宗親九族並蒙其榮卷二天龍鬼神皆來擁護使不枉橫萬分之後得生天上七寶宮殿在所自然侍從左右壽命延長恣意所之快樂難言天上壽盡下生世間當爲富貴王侯子孫端正聰慧人所奉尊其二婦者常得

惡名令現在身不得安寧數為惡鬼衆毒所
病起卧不安惡夢驚怖所願不得多逢災橫
萬分之後冤魄受形當入地獄餓鬼畜生展
轉三塗累劫不竟佛告玉耶是七輩婦汝欲
何行玉耶流涕前白佛言我心愚癡無智所
作自今以後改往修來當如婢婦奉事公姑
夫壻盡我壽命不敢僞慢佛告玉耶善哉善
哉人誰無過過能改者善莫大焉玉耶即前
請受十戒為優婆夷佛告玉耶持戒一者不
得殺生二者不得偷盜取他人物三者不得

姪洩犯他男子四者不得兩舌五者不得飲
酒六者不得惡罵七者不得綺語八者不得
嫉妬九者不得瞋恚十者信善得福作惡得
罪信佛信法信比丘僧是為十戒優婆夷法
終身奉行不敢違犯佛說經已諸弟子皆作
禮給孤長者公姑大小及玉耶盡行澡水供
養佛百味飲食佛告玉耶當信布施常得其
福後世當復生長者家玉耶言諾佛飯畢訖
達觀咒願五十善神擁護汝身佛告玉耶言
勤念經戒玉耶言我蒙佛恩得聞經法皆前

為佛作禮而去

玉耶經

玉耶女經

失譯人名今附西晉錄

聞如是一時佛在舍衛國祇樹給孤獨園為諸四輩弟子說經是時國中給孤獨家為子娶婦得長者女名曰玉耶端正殊特不以婦

輕慢公姑及以夫壻給孤獨長者夫婦議言是婦不順當云何教若加杖捶非善法也設不教訶其罪日增長者議曰惟佛能化明旦嚴服往詣佛所稽首禮足前白佛言我為子娶婦得長者女甚大憍慢不以婦禮惟願世尊哀愍我等并諸弟子明日勸請到舍說經令心開解佛即受請長者歡喜禮佛而歸長者到舍廣設調度嚴飾牀座明旦佛來到長者舍長者欣慶請如來入舍眾坐已定皆各禮佛却住一面佛飯食訖于時免經惟有